

Minister di Labor Paul Croes riba situacion di Westin Hotel “E impacto laboral ta uno grandi”

ORANJESTAD – E benta di Westin Hotel ta uno cu a causa basta consternacion den comunidad y a trece panico cerca e trahadonan, kendenan awor ta den un incertidumbre pa loke ta nan trabao. A base di esaki Minister Otmar Oduber di Turismo, Cultura y Transporte, y Paul Croes di Labor y Asuntonan social, a yama un conferencia di prensa cu caracter di urgencia, pa asina trece e punto di bista di gobierno dilanti pa loke ta e situacion coriente di e trahadonan. Esaki ta un impacto laboral grandi, cu den e situacion aki, gobierno ta sigui cu e proceso hopi di cerca pa mantene e tranquilidad laboral pa tur e trahadonan den e periodo aki.

INCERTIDUMBRE
Segun minister Paul Croes, ta papiando aki rond di 450 pa 460 trahado cu ta den servicio di hotel actualmente. Di e 460, 100 persona cu ta trahando den e casino. Ta un sentimento logico di cada trahado di un incertidumbre pa locual ta trata un traspaso di un bandera pa un otro bandera, den e caso aki di Westin pa eventualmente un hotel Riu den algun luna nos dilanti.

PROCESO
E situacion na Westin inmediatamente a wordo treci padilanti na Ministerio di Labor Sr. Paul Croes. E reemplasante di Croes, Minister Otmar Oduber di Turismo, Transporte y Cultura, a muestra e procesonan cu tabata tumando luga, e diferente informacionnan cu tabata tin rond di un posibel transaccion di un hotel pa

un otro hotel y den e caso aki finalmente durante e siman aki, oficialmente a wordo acerca pa e representantenan legal di e cumpradonan di e accionnan di Aruba Hotel Enterprises. E cumpradonan nobo, Infinity SL, un grupo di inversionista Spaño, lo ta cumprando e accionnan di Aruba Hotel Enterprises. Sinembargo e ultimo lo keda e dunado di trabao di tur e trahadonan di Westin Hotel.

SOSTEN DI GOBIERNO

Na momento cu ta trata di un inversion pa renoba un parti importante di e producto Aruba, den e caso aki, un hotel na Aruba, cu pa hopi aña a bin ta opera den un forma positivo na Aruba, semper gobierno ta para tras di esaki. Na momento cu por renoba y engrandecere e producto, automaticamente un inversion rond di 30 pa 40 miyon dollar naturalmente ta bon den economia, ta crea cuponan di trabao pa construccionnan na Aruba, pa un periodo y pa despues bay over na ordo di dia y continua operacion di un hotel manera cu nos conoce na Aruba.

UN EDIFICIO DETERIORA

Berdad durante hopi aña e deteriora pa loke ta edificio di Westin den e caso aki, no a conoce un inversion manera cu mester ta. Na momento cu esaki wordo haci, automaticamente esaki pa gobierno, e ta importante. Den e caso aki pa inicia esey ta e posicion di gobierno tambe na momento di un inyeccion economico importante asina. Durante e periodo tras

di lomba a monitor e situacion aki hopi di cerca.

MEDIADOR DI GOBIERNO

Gobierno a drenta den contacto cu mediador di gobierno, Sr. Anselmo Pontilius, kende ta encarga pa gobierno, pa e por monitor e situacionnan di labor na Aruba. Den e caso aki, e contacto tabata hopi estrecho durante ultimo lunanan. Banda di esey Sr. Pontilius, hunto cu director di labor, Sr. Kock, a muestra e importancia y interes di parti di labor pa loke ta e trahadonan den e situacion aki.

SINDICATO DI HOTEL

Tabata tin contacto tambe cu sindicato TEAM, cu ta e sindicato legal na e momentonan aki cu ta den Westin, cu tin un cantidad di mas of menos 200 miembro for di tur e trahadonan di Westin, pa pone nan na altura tambe kico ta e informacionnan cu a yega cerca gobierno, pa asina por tambe muestra cu gobierno ta al tanto riba e desaroyonan cu ta tumando luga na e hotel aki.

POSICION DI GOBIERNO

Durante e proceso aki un bi-aha mas, pa gobierno ta hopi importante. Ta bisa e posicion di gobierno den esaki, cu tin un inversion na e momentonan aki ta biniendo cu ta un interes financiero di un grupo opa renoba un propiedad, cual ta algo positivo pa nos pais, pero di otro banda tin derechonan di trahado cu tin cu cumpli cu nan segun nos leyman local. Segun leyman cu a wordo cambia tambe pa brinda mas protec-

cion na trahadonan durante e ultimo añanan. Den e caso aki tin cu bisa cu e balansa ey naturalmente ta locual ta maneha e vision di e ministerio di labor na e momento nan aki tambe. Aña pasa tabata tin cierto cambionan di ley pa loke ta trata tumamento di companianan pa asina brinda proteccion na trahadonan. Den e caso aki a check huristanan tambe pa por tin sigur tambe di kico ta papiando y ta papiando cu e dunado di trabao, cu ta Aruba Hotel Enterprises, cu lo ta e mesun dunado di trabao cu lo ta continua cu e relacion di trabao cu e trahadonan di Westin, manera a wordo mencionan anteriormente.

TRAHADONAN ADICIONAL

Minister Croes a sigui comenta cu tin comerciante den e edificio cu ta brinda un otro tipo di servicio apart di e hotel mes, cu tambe lo kier wak di cuanto persona ta trata, cuanto negoshi ta trata y kico lo ta consecuencia pa nan tambe. Esaki kiermen ta un situacion poco mas amplio. Na momento cu ta cera un hotel pa un periodo di renobacion, e impacto di esaki ta grandi y esey naturalmente gobierno ta keda monitor, teniendo na cuenta e derecho di trahado y e interes di parti di e dunado di trabao, pa loke ta trata e periodo nos dilanti.

CONTRACTONAN VIGENTE

E trahadonan por ta consciente cu e doño di trabao ta bay keda igual. E contracto cu nan tin cu nan doño di trabao, ta keda vigente, hasta pa e periodo di construccion. E ta keda na e derecho di e dunado di trabao, den e caso aki Aruba Hotel Enterprises, pa ofrece un paquete.

Esaki den cualkier organizacion ta posibel, pero ta keda na e libertad di e trahado pa evalua esaki si of no. Si e paquete social cu ta wordo entrega of ofreci na e trahado suficientemente atractivo, e ta keda e libertad di e trahado, pa tuma esaki si of no, e mandatario a comenta.

PROTECCION

Pa ta concreto tambe riba e periodo di construccion di e hotel, ta asina cu a fiha un maneho for di entrada di Sr. Paul Croes como minister di labor, cu ta trata na proteha e mercado local, e mercado laboral local prome, pa despues bay evalua otro opcion den periodo di construccion, den periodo di proyectonan. Den e caso aki no lo ta un excepcion tampoco.

TRAHADORNAN LOCAL PROME

Aruba conoce un grado di desempleo alrededor di 8%. Kiemen tin varios persona eyfo cu awor aki no tin un trabao. E maneho lo ta igual. Gobierno lo busca prome riba mercado laboral local esunnan cu lo mester bay over den e reconstruccion di e edificio aki. Tin diferente di e procesonan aki a tuma luga caba den pasado, na momento cu un hotel wordo tuma over pa un otro y den e proceso ey tin por ehempel tambe e mediador di gobierno, cu hopi experiencia den tumamento di propiedadnan asina, na unda cu e recomendacion tambe di parti di gobierno pa den e proceso aki involvi e mediador di gobierno. No warda te ora cu e bira un conflicto pa involvi'e, pero involvi'e na un forma mas prematuro, pa asina por evita na yega na un conflictonan, segun e mandatario. □